

Humberto Schmidt, miho graduado di Formacion Social:

"Danki na Minister Eman kende a bin cu e proyecto aki"



ORANJESTAD(AAN): Su determinacion y disciplina a lage resalta den su grupo y como bon ehempel el a keda honra cu nombracion di Miho Graduado. Ta trata di Humberto Schmidt, kende dialuna

ultimo a gradua di e prome fase di Formacion Social y a ricibi su baret, certificadonan y premio for di man di Prome Minister Mike Eman, kende a felicit'e y dese'e lo miho den futuro ofreciendo posibilidad



y yudansa pa sigui cu su estudio y desaroyo.

Cu hopi alegria y emocion Humberto Schmidt a ricibi e noticia di su premio, rondona no solamente pa su coleganan di grupo, lidernan di Marinierskazerne y representantenan di VNOA, pero principalmente di su mayornan. "Nunca mi a pensa cu mi lo sali miho graduado y mi ta hopi orguyoso di mi premiacion awe."

Pa Schmidt e experiencia di

forma parti den e di dos grupo di Formacion Social tabata uno na cuminsamento dificil, pasobra mester a siña lanta tempran y ta na ora. Ademas di esey e ta corda cu e tabata un tiki gordo, pero despues tiki tiki di tanto simannan den mondi, e curpa a cuminsa laga peso bay y tabata mas facil pa mi bay dilanti." Cu esaki el a demostra cu e proyecto no solamente a yud'e den e parti di capacitacion y balor moral, pero tambe den e aspecto fi-

sico.

Na su opinion "E beneficio mas grandi cu mi a saca afo ta e certificado cu mi a haya awe, y ainda falta un mas, esey ta otro aña ora mi caba mi opleiding. Danki na Minister Eman cu a bin cu e proyecto aki cu mi por a integra na dje y cu awo mi a caba full y mi por haya un miho trabao den futuro." Schmidt, mescos cu e otro hobennan di e grupo tabata tin mester mas ayudo y disciplina pa logra nan metanan en general, pero mas especificamente den educacion. Danki na e proyecto di Formacion Social, awor tin un caminda pa cana y yega na un diploma, cuminsa un carera of sigui pa logra otro metanan.

Despues di a biba un experiencia asina personal y positivo cu a dun'e e oportunidad pa sigui bay dilanti, e proyecto di Formacion Social ta algo cu e lo kier recomenda na otro hobennan. E hoben Schmidt a indica esey bisando directamente na e hobennan cu "Bo no mester tin miedo, djis aplica boluntariamente na Bestuurskantoor y bay p'e. No worry cu loke bo brothernan bisa bo cu esaki ta coy kens. Mi mes tabata bisa coy kens y wak unda mi ta awo, te na final."

E Proyecto Formacion Social ta un cooperacion entre Gabinete Mike Eman, Ministerio di Defensa y Ministerio di Asuntonan Interior di Hulanda.